Da Numba One Letta
From John

*Wat God Say Make Us Come Alive Inside*

1 From da time everything had start, had one Guy, “God’s Talk,” dass who him. He da One dat can make da peopo come alive inside fo real. You know, me an da odda guys dat was wit Jesus, we wen hear him, see him wit our own eyes, look at him real good, an touch him wit our hands. 2 Da One dat can make everybody come alive inside fo real kine, he wen show up by me an da odda peopo. We wen see him, an now we tell you guys fo shua bout da real kine life he give dat stay to da max foeva. Dat life come from him. He wen stay wit da Fadda, an den show up by us. 3 Us guys wen see an hear all dat, an we telling you guys too, so you guys can stay tight wit us. We all stay tight wit da Fadda an his Boy Jesus Christ, da Spesho Guy God Wen Send. 4 We write dis stuff to you guys so dat we can stay good inside to da max.

*God, He Good*

5 Dis da stuff Jesus wen tell us, an we tell you guys: God, he good, an wit him fo shua no mo notting bad. He jalike da light, an he no mo dark kine stuff. 6 If we say we stay tight wit God, but still yet do bad kine stuff, dass jalike we stay inside one dark place. We stay bulai, an we no do notting da true way. 7 But if we do good kine stuff, dass jalike we stay inside da light, jalike God stay inside da light. Den we stay tight wit each odda. You know, Jesus, God’s Boy, he wen bleed an mahke, an dass jalike his blood clean us up inside from all da bad kine stuff we wen do.
8 If we say we no do bad kine stuff, we stay bulai to ourself, an we donno wass true. 9 But if we tell God we sorry fo all da bad kine stuff we wen do wrong, we can trus God fo do wat he wen say he goin do, an do da right ting. God goin hemo our shame, an wash us clean inside from all da stuff we do dass not right. 10 If we say we neva do bad kine stuff eva, dass jalike we saying God one bulaia. Den wat he say no stay inside us.

2

**Christ Help Us**

1 Eh, my good friends! I stay write dis stuff to you guys, so you no do bad kine stuff. But wen get somebody dat do bad kine stuff, we get one Guy dat stay talk to his Fadda fo us. Dass Jesus Christ, da Spesho Guy God Wen Send. He everytime stay do da right ting. 2 Jesus, he da one dat wen mahke fo be da sacrifice dat let us guys go an hemo da shame fo all da bad kine stuff we wen do. Jesus wen mahke, not ony fo us, but fo da bad kine stuff dat all da peopo inside da whole world wen do. 3 Dis how we stay shua we know God fo real kine: cuz we do da tings he tell us fo do. 4 Whoeva say “I know God,” but dey no do wat God tell us fo do, dey one bulaia. Dey donno da true way. 5 But whoeva do wat God say, dat show dey get plenny love fo God, an da love an aloha stay coming good to da max inside dem. Dass how we know we God’s guys. 6 Whoeva say dey stay tight wit God, dey gotta do everything jalike Jesus wen do.

**Da New Ting You Guys Gotta Do**

7 My good friends, I no write you guys one new ting God say you guys gotta do, but one old ting you guys wen hear from da start. Dis old ting, dass da same stuff you guys wen hear befo. 8 Still yet, I writing you guys one new ting
God say you guys gotta do. Da new ting stay true bout Jesus an bout you guys. Cuz wen you guys do wat God say, jalike da dark stay going away, an da real light stay shining awready.

Dis wat God say: whoeva say dey stay inside da light, but hate dea brudda o sista, jalike dey stay inside da dark still yet. Whoeva get love an aloha fo dea brudda an sista, jalike dey stay inside da light, an no mo notting inside dem dat goin make anybody do bad kine stuff.

But whoeva hate dea brudda o sista, jalike dey stay inside da dark. Dey walk aroun inside da dark, an dey donno wea dey going, cuz da dark make um blind.

I writing to you kids,
    Cuz God wen let you guys go
    An hemo all da shame
    Fo all da bad kine stuff you guys wen do.
    He do dat cuz you wen come his guys.

I writing to you faddas,
    Cuz you guys know God fo real kine, who stay from befo time.
I writing to you younga guys,
    Cuz you guys wen fight da Bad Guy, da Devil, an win.

I writing to you kids
    Cuz you guys wen know da Fadda fo real kine.
I writing to you faddas,
    Cuz you guys wen know da One who stay from befo time.
I writing to you younga guys,
    Cuz you guys strong, an wat God say stay inside you guys,
    An you guys wen fight da Bad Guy, da Devil, an win.

No get love fo da bad kine stuff dat stay inside dis world. If anybody get love fo dis world, den dey no mo
love fo da Fadda. 16 You know, all da bad kine stuff dat stay inside dis world, da kine da peopo like get real bad ony fo make demself feel good, da kine stuff dey like look at an get ony fo demself, an da kine stuff dey get dat let um make big show, all dat no come from da Fadda, but from dis world. 17 Dis world an all da stuff da peopo like get, dat goin all pau. But da guy dat do wat God like him fo do, he goin live fo real kine foeva.

_Da Peopo Dat Go Agains Christ_

18 My good friends, da last time stay now. You wen hear dat one guy goin come dat go agains Christ, da Spesho Guy God Wen Send. You know, get plenny guys awready dat go agains Christ. Dass how we know da last time stay now. 19 Dem guys wen go way from us, but dey neva come from us. If dey wen come from us, den dey wen stay wit us. But dey wen go way, an dat show dat all dem guys neva come from us.

20 But you guys, you wen get power from God’s Good An Spesho Spirit, an you guys all know wass true. 21 I writing you guys cuz you awready know wass true. You guys know dat if anybody bulai, dass cuz dey no like you fo know wass true, yeah?


24 Make shua you guys stick wit wat you guys wen hear from da first time. If you guys stick wit dat, den you goin stick wit God da Fadda an his Boy too. 25 Dis wat he wen say he goin give us -- da real kine life dat stay to da max foeva.
26 I writing you guys dis stuff bout da peopo dat bulai you guys. 27 But you guys wen get power from God’s Spesho Spirit. He awready stay inside you guys, so you guys no need nobody fo teach you guys. God’s Spirit stay teach you guys bout everything, an wat he teach stay true. He no bulai. So, jalie he wen teach you guys, stick wit him.

28 So now, my good friends, stick wit Jesus, so dat wen he come back, we no need be scared o shame in front him. 29 You guys know dat God’s Spesho Guy everytime do da right ting. So you guys know dat everybody dat do da right ting, dey God’s kids.

3

God’s Kids

1 Tink bout da kine love an aloha da Fadda wen show us! He even wen call us his kids! An we his kids fo real kine, you know. Az why da peopo inside da world donno wat kine peopo us, cuz dey donno wat kine God. 2 My good friends, we God’s kids awready. God neva show us yet wat kine we goin be bumbye. But we know dat wen Christ come back, we goin be jalie him, cuz we goin see him jalie he stay. 3 Everybody dat know dat, an stay trus Christ, an wait fo him, dat guy make his own heart clean inside, jalie Christ stay clean inside.

4 Whoeva do bad kine stuff wen broke God’s Rules, cuz wen you do bad kine stuff, dat mean you no listen to God’s Rules. 5 You guys know dat Christ wen come fo throw out da bad kine stuff we wen do. Christ, he no do bad kine stuff, eva. 6 Whoeva stay tight wit Christ no stay do bad kine stuff. Whoeva stay do bad kine stuff, jalie dey neva see Christ o know him fo real kine.

7 My good friends, no let nobody bulai you guys. Whoeva stay do da right kine tings, dey stay right, jalie
Christ stay right. 8 Whoeva stay do bad kine stuff, dey da Devil’s kid, cuz from da first time da Devil stay do bad kine stuff. Dass why God’s Boy wen come, fo bus up da bad kine stuff da Devil stay doing.

9 Whoeva God’s kids no stay do bad kine stuff, cuz jalike God stay live inside dem now. Dey no stay do bad kine stuff, cuz dey come from God. 10 Dis how we can know who God’s kids an who da Devil’s kids. Whoeva no do da right kine tings, not God’s kids. Whoeva no mo love an aloha fo dea brudda an sista, dey not God’s kids too.

*Get Love An Aloha Fo Each Odda*
*(Da Start 4:1-12)*

11 Da ting you wen hear from da first time say dis: We gotta get love an aloha fo each odda. 12 Tink bout da story inside da Bible from befo time. No make like Cain. He wen stick wit da Bad Guy, da Devil, an kill his own brudda. How come he wen kill him? Cuz Cain wen do bad kine tings, an his brudda wen do da right kine tings.

13 My bruddas an sistas, wen da peopo inside dis world hate you guys, no let dat blow yoa mind. 14 Us guys not mahke inside no moa, but we wen come alive inside fo real kine. An how come we know dat? Cuz we get love an aloha fo our bruddas an sistas, az why. Whoeva no mo love an aloha, stay cut off from God, jalike dey stay mahke inside. 15 Whoeva hate dea brudda an sista, jalike dey one guy dat kill peopo. An you know dat one guy dat kill peopo no mo da real kine life dat stay to da max foeva. 16 Dis how we know wat real love stay like: cuz Christ wen give himself fo mahke fo us. So den, we gotta be ready fo do da same kine ting fo our bruddas an sistas. 17 If get somebody dat get plenny stuffs, an dey see dat dea brudda o sista no mo notting, but dey no mo pity fo dem, how dey can say dat dey get love an aloha fo God? No can. 18 My good friends,
no can show love wit talk ony, but gotta show da kine love
dass fo real, an do good kine tings fo everybody.

*We No Need Come Scared In Front God*

19 So, wen us guys get dat kine love an aloha, den we
know dat we stick wit wass true. We tell our own heart
dat everything stay okay now, da way God see us. 20 But no
matta inside our heart we tinking plenny bout da bad kine
stuff we wen do, same time, we know dat God mo big den
our heart, an he know everything bout us guys. 21 My good
friends, if our heart no tell us we wen do bad kine stuff,
we know same time we no need be shame in front God.
22 An we get from God wateva we aks him fo do, cuz we do
wat he tell us, an do wat he like. 23 Dis wat God wen tell us
fo do: ‘Trus his Boy Jesus Christ, da Spesho Guy God Wen
Send, an get love an aloha fo each odda, jalike he wen tell
us. 24 Everybody dat do wat God tell us, dey stay tight wit
God, an God stay tight wit dem. Dis how we know dat God
stay tight wit us, cuz God wen give us his Spirit.

4

*Da True Spirit an da Spirit Dat Bulai*

1 My good friends, no go trus jus anybody dat say dey
get God’s Spirit, but check um out fo see if dey come from
God. Cuz get plenny fake guys wen go all ova da world.
Dey say dey talkas fo God, but dey not. 2 Dis how you
know da Spirit dat come from God: wen get somebody dat
say Jesus Christ wen come one real guy jalike us, dass da
guy wit da Spirit dat come from God. 3 But wen somebody
say dat Jesus neva come one real guy, dass da guy wit da
spirit dat no come from God. Dass da same spirit dat stay
go agains Christ. You guys wen hear dat one guy dat go
againz Christ goin come, an now dat guy stay awready
inside da world.
My good friends, you guys come from God. Da One dat stay inside you guys mo strong den da Bad Guy dat stay inside da world. Dass why you guys wen stand up agains dem guys dat bulai an you guys wen win. Dem guys dat bulai, dey come from dis world. Dass why da tings dey say come from dis world, an da peopo inside da world listen to dem. But us, we come from God. Da guy dat know God listen to us. Da guy dat no come from God no listen to us. Dass how we know da Spirit dat tell da trut an da spirit dat bulai.

God Get Love an Aloha fo Everybody
My good friends, we gotta get love an aloha fo each odda, cuz love an aloha come from God. Everybody dat get love an aloha, dey God’s kids, an know God. Da guy dat no mo love an aloha donno God, cuz God everytime get love an aloha fo everybody -- dass how he stay. Dis how God wen show us dat he get love an aloha fo us: he wen send his one an ony Boy fo come inside da world, so dat we can come alive inside fo real kine, cuz a him. Dis how da real kine love stay: God wen get love an aloha fo us guys, no matta us guys neva get love an aloha fo him. An he wen send his Boy fo mahke so he can be da sacrifice dat hemo da shame fo all da bad kine stuff we wen do.

My good friends, cuz God wen show dat kine love an aloha fo us guys, den us guys gotta show love an aloha fo each odda too. No matta no mo nobody eva wen see God fo real kine -- if we get love an aloha fo each odda, den God stay wit us an his love stay to da max inside all us guys.

Dis how we know dat we stay tight wit God an he stay tight wit us, cuz he wen give us his Spirit fo take charge a us. Me an da odda peopo wen see God’s Boy, an we tell everybody dat da Fadda wen send him fo take da peopo inside dis world outa da bad kine stuff dey doing.
15 Whoeva say dat Jesus, he God’s Boy, God stay tight wit dem, an dey stay tight wit God too. 16 We know an trus dat God get love an aloha fo us guys.

Da way God stay, he everytime get love an aloha fo everybody. Whoeva get love an aloha, dey stay tight wit God, an God stay tight wit dem too. 17 I mean dis: wen da same kine love an aloha dat God get, stay to da max inside all us guys, den we no need be scared wen we stand in front God da Judge, cuz inside dis world we jalike Christ awready. 18 No need be scared if get love an aloha. Cuz if da same kine love an aloha dat God get stay plenny, den no goin stay scared. Whoeva stay scared, dey suffa plenny, jalike somebody stay punish dem. Jalike dey not grown up inside, dey still yet jalike one small kid, cuz dey no mo plenny love an aloha.

19 Us guys get love an aloha fo God cuz he wen get love an aloha fo us first. 20 Whoeva say, “I get love an aloha fo God,” but dey hate dea brudda o sista, dey bulai. Cuz if dey no mo love an aloha fo dea brudda o sista dat dey can see, how dey can get love an aloha fo da God dat dey neva see? 21 Dis wat Christ wen tell us guys fo do: Whoeva get love an aloha fo God gotta get love an aloha fo dea brudda an sista too.

We Can Stand Up Agains Da Bad Kine Stuff An Win

1 Whoeva stay shua dat Jesus da Spesho Guy God Wen Send, dey God’s kids. Everybody dat get love an aloha fo one fadda get love an aloha fo his kids too. 2 Dis how we know dat we get love an aloha fo God’s kids, cuz we get love an aloha fo God an do wat he tell us fo do. 3 If we get love an aloha fo God, dat mean we do wat he tell us fo do. An da stuff he tell us fo do, not too hard. 4 Cuz all God’s
kids can stand up against da bad kine stuff inside da world, an win. Dis how we can do dat: we trus God. Da guy dat stay shua dat Jesus God’s Boy, az da ony guy dat can stand up against da bad kine stuff inside da world, an win.

*Three Tings Dat Tell Bout Jesus*


*Da Kine Life Dat Goin Stay To Da Max Foeva*

I write dis to you guys dat stay trus God’s Boy so you guys can know dat you guys get da real kine life dat stay to da max foeva. Everytime we aks God fo do da tings he like make happen, we know fo shua dat he hear us. An if we know dat he stay listen fo wateva we aks him, den we know dat we goin get da tings we wen aks him fo do. If you see youa brudda doing bad kine stuff dat no make da brudda mahke, you gotta aks God fo help um, an God goin give da brudda life. I talking bout da bad kine tings dat peopo do, but dat no make um mahke. Get bad
Numba 1 From John 5:17

stuff dat make um mahke -- I no say dat you gotta pray bout dat kine. 17 Everyting dat stay wrong, dass bad kine stuff. An get bad kine stuff dat no make da guy mahke dat do um.

18 We know dat everybody dat stay God’s kid no stay doing bad kine stuff, cuz God’s Boy take care him, an da Bad Guy, da Devil, no can hurt him.

19 Us guys know dat we come from God, but da Bad Guy stay in charge a all da odda peopo inside da whole world.

20 We know dat God’s Boy wen come an help us fo undastan, so dat we can know da One dass God fo real kine. Us guys stay tight wit da One dass God fo real kine -- wit God’s Boy Jesus, da Spesho Guy God Wen Send. Dass da real God, an dass da real kine life dat stay to da max foeva.

21 Eh you guys! You jalike my own kids! So, stay away from da idol kine gods.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 28 Jul 2020 from source files dated 14 Jul 2020
6b92212a-b57c-5ce4-a7af-83bfd6f8d613